

Frederi MISTRAL Nebout
Capoulié dóu Felibrige
DISCOURS À LA SANTO ESTELLO DE TOULOUSO

1950

NA FILADELFO,
GÈNTI RÈINO,
MIDAMO,
MESSIÉS,
CAR FELIBRE,

Encaro que lou capoulié Fèlis Gras fugue vengu eici, li 5 e 6 de mai 1894, ié bateja l'Escolo Moundino, la Coupo es, pèr lou proumié cop, poutado à Toulouso, maire e flour dóu Parage, capitalo di Terro ramoundino, ciéuta ilustro, pastado de record, clafido de glòri, adournado de mounumen superbe e ounte li cor sensible barbèlon encaro au souveni de Clemènço Isauro emai de la bello Paulo.

De grands ome de touto meno, de pouèto, d'artista, Diéu saup se n'i'a toustèms agu dins aquesto vilo. Saup tambèn quant de martire e de patrioto, is ouro sournò, desempieï Dono Guinaudo, aclapado à Lavau, fin qu'i defensour de si bàrri, en passant pèr lou Rèi En Pèire d'Aragoun, toumba à Muret, e i dono e chato valènto que, d'un cop de pèiro bèn mandado, enrediguèron Simoun de Mount-Fort.

Ramenta aquéu regiscle de dòu e de glòri, de valènci e de courage, es pas faire obro vano, es pas cerca sus uno terro ensaunousido li traço d'un patrioutisme esvani. Bèn lou countràri, es se tanca sus ço qu'eisisto de mai soulide, es, nous souvenènt dóu crid de guerro atavi Toulouso, Marsiho, Avignoun, Prouvènço e rendènt à nòsti davancié l'óumage degu, nous assoulida sus lou presènt e nous counfourta pèr l'aveni, en sachènt que lou crid de guerro es devengu, aro, un crid de pas, pèr pau que nous fagon noste dre...

En tout cas, èro pèr iéu, capoulié elegi en Avignoun, un devé de pourta à Toulouso la Coupo di souvenènço, dis estrambord e dis espèr. Es pièi, lou dise autamen, un bèl ounour d'agué proche iéu Filadelfo, la grandò Filadelfo, la faidito ispirado dount li crids sonon à nòstis auriho e canton dins nosto memento, aquéli crid boulouversant e capable, se lou meritavian, d'auboura nòstis amo i plus àuti cimo de la pouèsio terradourenco, capable, se lou voulían, d'auboura nosto Raço à soun deliéuramen, coume lou desirèron Mistral, Fèlis Gras, Pèire Devoluy, tóuti nòsti capoulié enfin, entre li quau dounarai un souveni esmóugu, emé li sentimen que devinarés eisadamen, à Marius Jouveau de noblo memòri, moun predecessour, qu'avèn perdu ai las! coume lou souvetèron un Fourés, un Jousè d'Arbaud que plouran, d'Arbaud lou grand pouèto dóu Lausié d'Arle e de la Gamargo. M'es, enfin, un plesi requist de saluda en la persouno de Rozès de Brousse, de Ramound Lizop, e subretout de l'abat Jousè Salvat, miraclosamen tourna di camp de mort, tres bèlli figuro felibrenco de vosto vilo. A-n-éli, à tóutis aquéli que lis an ajuda, is Escolo e group acampa vuei, porge li coumplimen e li gramaci dóu Felibrige qu'ai l'ounour de presida.